



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

Trump jakla ni kanga junga meteta lir: Kamala Harris

Israel nem tenokdangba agütsütsü akhangba IOC aser Macron-i magizük

VOL. XXI ISSUE NO. 282 (ADOK 282) DIMAPUR YANGTEPNÜ (THURSDAY) CHITENI (JULY) 25, 2024 ₹ 5.00

Sorkari mapa tasen adoktsü makoker: CIC

Kohima, July 24, 2024 (TYO): Nagaland nung mapa bushir nisung 71,000 tema lir aser sorkari manguba lanurtem asoshi sorkar mapa tasen adoktsü makoker ta Chief Information Commissioner, I. Meyionen Jamir-i ashi.

Bodbarñü Nagaland Power Solutions & Machineries nung Honda India Power Products Ltd. (Sales, Service & Spare Parts) Authorised Dealer lapoktsüdang pai iba osang metetdaksü.

March 31, 2024 tashi nung Nagaland nung mapa bushir nisung 71,322 lir ta Meyionen-i ashi.

NPSC-i 2022 nung candidate 347 aser 2023 nung candidates 292 anioktsü ashi aser iba tetezü NPSC-i küm nung mapa 300 shi ka atema dang nisungtem

shimoker ta pai ashi. NSSB mezüing küm 2022 nung backlogs ajak dennür candidates 587 aser 2023 nung candidates 295 shimtsü ashi aser ibaji kümshia nisung noklang asemsem shimba asütsü, ta Meyionen-isa ashi.

Nagaland state sorkar indang 2024-25 budget reprangdangra 90.69% ji salaries, pension aser debt servicing atema lir. Anungji mapa mangur nisung 71,000 tema asoshi kümshia sorkar mapa 600-700 shi dang adoker, ta pai metetdaksü.

"Nagaland sorkar mapa tasen adoktsüsa jenjang ka nung mali. Anungji lanurtemi

entrepreneurship inyaksüla aser sorkar mapa dang masü saka tanga mapa bushirtem ajungmesotsüla" ta Meyionen-isa ashi.

DES nung induction training tenzükogo

Kohima, July 24, 2024 (TYO): NPSC aser NSSB ajanga mapa nung aniokertem asoshi Office Procedures and Official Statistics indang Induction Training ka tenzükogo.

Iba sentong ya Directorate of Economics & Statistics, Nagaland ajanga ayongzüker aser Economics & Statistics Director Neidilhou Keditsu-i tanü sentong tenzüktsü. Iba sentong nung nisung 18 adener.

"Department of Economics and Statistics ya maneni renloka

aoba department ka lir anungji staff tasentemi department tejakleni anir aotsü atema nendaka inyaksüla" ta Keditsu-i ashi.

Department inyaksangshi angatetsü atema kümshia induction training agir. Iba ajanga tangazükba tasentem den maparen nung takok angutsü angazükker ta pai ashi.

Iba sentong nung shisalen sayurji Economics & Statistics Department Under Secretary Rhonthungo Andreas liasü.

Kekhrie Yhome-i Australia ketdangsürtem den ajurutep



July 24, 2024 nü New Delhi Advisor Dr. Kekhrie Yhome aser Liaison Officer Kedi Kense nati Austrade ketdangsür Dr. Monica Kennedy aser Senior Director Neha Grover na den ajurutepdang agiba noksa ka angur.

Dimapur, July 24, 2024 (TYO): School Education aser School Council of Educational Research & Training Advisor Dr. Kekhrie Yhome-i Bodbarñü Australia nung ketdangsürtem den ajurutepogo.

Tanü pai Austrade tanishir Dr. Monica Kennedy aser Trade and Investment (Education), Government of Australia nung Senior Director Neha Grover na den ajurutep.

Advisor Yhome den Kedi Kense, Liaison Officer, Government of Nagaland nati Australia ketdangsürtem den ajurutep.

Australia ya vocational education atema tongtipang linük ka lir aser Nagaland nungi mapa inyaksü nübo tajung aika lir anungji taküm September ita Department of School Education ketdangsürtemi Australia semdangi aotsü atema senden nung jembitep.

NE atema Rs 8378.53 crore lezmüktsüogo: Railway minister

Dimapur, July 24, 2024 (TYO): Minister for railways, Information & Broadcasting, and Electronics & Information Technology Ashwini Vaishnav-i Bodbarñü North Eastern Region nungi osangbener den sensaksemdang General Budget 2024-25 nung Railway Ministry nem lezmüktsüba osang lemsatop.

Taküm Budget nung Railways atema Rs. 2.62 lakh crores lezmükja lir aser iba nungi Rs. 1.08 lakh crores jisafety enhancements, track replacements, signaling system upgrades, Kavach system installations aser Road Under Bridges/Road Over Bridges atema lir ta Ashwini Vaishnav-i ashi.

"Financial Year 2024-25 atema Northeast Frontier (N.F.) Railway atema Gross Budget Allocation ji Rs. 14,183.69 crores lir aser iba nungi Northeast state tem asoshi Rs. 10,376 crores lir. Iba ya 2009-

14 tsüingda Rs. 2,122 crores lezmüktsüba dang nungi pungüsü agi teimba lir" ta Minister Vaishnav-isa ashi.

2014 nungi N.F. Railway nung Road Over Bridges/Road Under Bridges 497 yanglutetogo aser iba ajanga level crossings melenzüka road & rail safety tajungba kümogo, ta Union Minister-isa ashi.

Centre sorkari Indian Railways ya world-class transportation network kümdaktsütsü, rongsenketzüing aintsü aser mapa adokdaksütsü temulung agütsür ta paisa ashi.

Amrit Bharat Stations Scheme kübok N.F. Railway nung station 60 tashi world-class facilities keta yanglushitsü.

Railway station 60 nungi 50 ji Assam nung lir aser iba sülen Tripura nung 4, Arunachal Pradesh, Manipur, Meghalaya, Mizoram, Nagaland aser Sikkim nung kaka lir.

Arunachal Pradesh (1): Naharlagun (Itanagar)

Assam (50) : Amguri, Arunachal, Chaparmukh, Dhemaji, Dhubri, Dibrugarh, Diphu, Duliajan, Fakiragram Jn., Gauripur, Gohpur, Golaghat, Gosai gaon hat, Guwahati, Haibargaon, Harmuti, Hojai, Jagi Road, Jorhat Town, Kamakhya Jn, Kokrajhar, Lanka, Ledo, Luming Jn, Majbat, Makum Jn, Margherita, Mariani Jn, Murkongselek, Naharkatiya, Nalbari, Namrup, Narangi, New Bongaigaon Jn, New Haflong, New Karimganj Jn, New Tinsukia Jn, North Lakhimpur, Pathshala, Rangapara North Jn, Rangiya Jn, Sarupathar, Sibsagar Town, Silapathar, Silchar, Simaluguri, Tangla, Tinsukia, Udalguri, Viswanath Chariali

Manipur (1): Imphal
Meghalaya (1): Mendi Pathar
Mizoram (1): Sairang (Aizawl)
Nagaland (1): Dimapur
Sikkim (1): Rangpo
Tripura (4): Agartala, Dharmanagar, Kumarghat, Udaipu

Minister Jacob-i Union Minister Paatil den ajurutep

Dimapur, July 24, 2024 (TYO): PHED & Cooperation Minister Jacob Zhimomi-i New Delhi nung Union Minister of Jal Shakti CR Paatil den ajurutep.

Iba senden nung Union Minister of State for Jal Shakti Dr. Raj Bhushan Choudhury, Department of Drinking Water & Sanitation, GoI Secretary Vini Mahajan aser Department of Water Resources, GoI Secretary Debashree Mukherjee nung aden.

Minister Jacob-i CR Paatil dang Lok Sabha nung takok

anguba aser Union Minister inyakba atema tenüngsang agütsü.

Paisa Nagaland nung Jal Jeevan Mission projects inyakba aser iba ajanga nübortemi tajangzük anguba osang lemsatop.

"December 2024 tashi nung Nagaland nung Jal Jeevan Mission tembangtsü aser onoki beneficiary ajak nem 100% tap water connection agütsütsü tenangzükba lir. Tang Nagaland nung JJM kübok tap water connection 91.3% lir" ta Jacob-i ashi.

Tanü senden nungsa Swachh Bharat Mission (Gramin) indang jembi kechiyong iba ya Ministry of Jal Shakti kübok lir. Parnoki yimtsüing aser jilatem nung solid aser liquid waste management indang tebilembatem lemsatop.

Jacob-isa CR Paatil dang Nagaland maneni yaritsü mepishia liasü.

CR Paatil-ia Minister Jacob dang PM Modi'er Har Ghar Jal mangdang ataloktsü atema Nagaland nung JJM aser SBM (G) takok ngua inyaksütsü asoshi yariteptsü nangzük.

Manipur nung 'Disturbance-Free Educational Zone' akhanger

Imphal, July 24, 2024 (Agencies): Manipur nung shisaliok bushibaren nung timtem magütsütsü takhangba agüja Manipur University-i July 24 nü lungkak aitiba sentong ka agiogo.

Iba sentong ya "Disturbance-Free Educational Zone Demand" campaign nung shilem ka lir. Co-ordinating Committee on Disturbance-Free Educational

Zone Demand campaign nung school tesayurtem aser kaketshir teloktem dena lir.

Manipur tensa ajanga educational sector nung timtem aika bentsür arur. Telungpur telok aikati shisaliok rejutem dang tashiyim agi sen meshir aser iba ajanga kaketshirtemi timtem ajurur, ta lungkak aiter Kshetrimayum Oken Singh-i ashi.

Pai telungpur teloktem dang iba mapa meinyaktsü aser shisaliok rejutem nem timtem magütsütsü metetdaksü.

Manipur tensa majungba ajanga class shitak magiteter. Tangalenbo tensa majungyonga shisaluyimba nung timtem magütsür anungji Manipur sorkaria shisaliok rejutem kümzükka ayutsü atema mapa inyaksüla ta Singh-isa ashi.

US sensotem dang Manipur-i maotsü tuyur

New Delhi, July 24, 2024 (Agencies): United States-i India atema travel advisory ka metetdaksüogo aser iba nung US sensotem dang tesem kari maotsü shiogo.

US State Department-i sayaba advisory nung India ajungalen Level 2 nung lir saka tesem kar Level 4 "Do Not Travel" status nung züngoka lir.

Jammu and Kashmir, India-Pakistan arrtsü, Manipur aser

Naxalite mapa inyakba Central aser Eastern India tesem kari maotsüla ta State Department-i metetdaksüogo.

Manipur nung kin o kin rara adokba aser ozüing alema inyakba ajanga Level 4 area nung züngoka lir. US sorkar mapa inyakeritemi iba tesemi aotsü asoshi special authorization nungdaksü ta State Department-i ashi.

Northeast nung tesem kar nung kiralongraba mapa inyakba

agi Level 4 nung dena lir aser iba jagi US-i par sensotem dang northeastern state-i mao tajungba ta shiogo.

US sorkarisa eastern Maharashtra, northern Telangana aser western West Bengal kübok yimtsüingtem nung emergency services magütsütettsü ta shiogo. Item tesemi aotsü asoshi US sorkar mapa inyakeritemi special authorization meshitsüla State Department-i ashi.

Kohima District Planning and Development Board senden amen



Bodhbarnü DPDB Hall, Kohima nung Kohima District Planning & Development Board senden amendang tangokba noksa nung angur.

Dimapur, Chiteni/July 24 (TYO): Kohima District Planning and Development Board (DPDB) pur July ita atema senden DPDB Hall, Kohima nung July 24, 2024 nü DPDB chairman Dr. Tseilhoutuo Rhutso dener mena liasü.

Iba senden Kohima DPDB vice chairman Kumar Ramnikant, IAS lenisüba kübok agi aser pai züngsem tasen pela agizükba den külemi taoba DPDB senden nung lemteta aliba lepa repringshia liasü.

Iba senden nung Mountain Trail Society aser All Nagaland State Carrom Association indang onük jembia liasü. Tent anaprong ya Daklane Colony, Kohima nung lir, aser parnoki report tem agütsüba sülen Board ajanga society anaprong registration atema temaba ketdangsür dangi abentsü mulunga agizük.

District Education Officer (DEO) ajanga inyakyim balala

jangatsüba sülen St. Mary's Cathedral Hr. Sec. School lapoktsü atema proposal ya Board-i agizük.

Village Adoption Scheme funding timba akumtsü atema telemtetba agia LADP Common Pool kübok constituency shia sen lakh ana aliba nungi asem kumtsü.

Board-isa fiscal year 2024-25 atema Local Area Development Programme (LADP) kübok proposals tem agizüka liasü.

Senden nung School Education Department ajanga Kohima district kübok par department inyakyim indang tejangja PowerPoint nung agüja liasü.

Iba mapang DEO Kohima ajanga district nung government school 121 aser private school 97 lir ta ashi.

Laisa textbooks aser school uniforms takok ngua angati lemtsüogo aser tesüiba küm ana tsüngta government school

nungi HSLC tatidang nung nil results meliasü, ta ashi. Ajisüaka lai government school tem tajungba kuma renloktsü nungdaker ta shia liasü.

DEO ajangasa PM-POSHAN mapa kuma inyakba, digital infrastructure yangluba aser Science, Maths aser Environment exhibitions ayongzükba, Social and Emotional Learning for Teachers sentong agiba, saisapong aliba, tetsür atema self-defense classes agiba, vocational education, special needs education, Performance Incentives Grant, aser Nagaland Education Project-the Lighthouse project (NECTAR) amala inyakyim balala indang osang lemsatapa liasü.

Public Health Engineering (PHE) Department ajanga tzü ajung-majung tendangsü atema yimya sayua liasü aser Board züngsemtem nem testing kits lema agüja liasü.

NSCN/GPRN-K (Niki) Angami Region atema ketdangsür shim

Dimapur, Chiteni/July 24 (TYO): NSCN/GPRN-K (Niki) indang MIP sangdong ka ajanga ashiba agi, Neidou Metha, Tatar aser Viketouzo Swuro, Tatar na Angami Region indang Caretaker aser Public Relation Officer (PRO) shimogo.

Angami Region dak sendakba maparen ajak nung

mapa nunglokja aliba ketdangsürtem den teka amteper inyaksü aser osangtsüsang agiteptsü metetdaksür ta Secretary, Kilo Affairs, NSCN/GPRN indang office nungi iba atema sangdong ka prokshia liasü.

NSCN/GPRN ajanga temelaba magütsüi ketdangsür/

kija den inyaksangshiba kija mesüra telok dangi timtem arura pei khuret asütsü. Neidou Metha, Caretaker den phone number 8974034362 aser Viketouzou Swuro, PRO den phone number 9863178316 ajanga tongtepratep sütettsü, ta NSCN/GPRN sangdong ajangasa ashi.

NBSE ajanga E-Migration Certificate agütsür

Dimapur, Chiteni/July 24 (TYO): Academic year 2023-24 nungi tenzüka HSLC aser HSSLC tatidang nung pass asüba candidate atema Nagaland Board of School Education (NBSE) indang portal <https://nbsenl.edu.in/> nung digitally signed E-Migration Certificate agütsür, ta NBSE sangdong ka ajanga ashi.

IT Act, 2000 kübok digitally signed document ya handwritten/signed hard copy

document den sako lir ta Heads of registered Institutions aser nisung ajaki metettsüla.

Anungji Board ajanga agütsüba digitally signed E-Migration Certificate bena aliba kaketshir tem hard copy magütsüba mechi admission magütsüi mayutsüla. Iba document nungya QR code inoka lir, anungji certificate indang tejangja metettsü asoshi QR code scanner ajanga scane sütettsü, ta NBSE sangdong ajangasa ashi.

Motor Vehicles Department-i Digital Payment services semzükogo

Dimapur, Chiteni/July 24 (TYO): Motor Vehicles Department (MVD), Government of Nagaland ajanga state aser linük nung service tajung aser tekeraba nung agütsütsü meranga tanen makai inyaker. Service aser delivery processes atema transaction ajak IT platform nung board asütsü nükjidong nung Motor Vehicles Department ajanga HDFC Bank den lungjemer state künok RTP aser DTO office ajunga nung Digital Payment services semzüktsüogo.

Iba service semzüktsüba sentong ya July 19, 2024 nü Transport Commissionerate, Kohima, Nagaland nung agia liasü.

Iba service ya ajanga ochimashi inyakyim samatsü, inyaksangshi tajungba aser tekeraba nung agütsütsü. Iba ya ajanga Department-i nüburtem tenzükba mapa nung tashi itshitsü.

Commissioner & Secretary, Dr. Zasekuolie Chusi, IAS ajanga sorkar tenüng nung iba service ya semzükja liasü, kong Transport Commissioner, Elias T. Lotha den HDFC Bank nungi Cluster Head Lansingam Panmei-i anir ketdangsürtem dena liasü.

Iba inyakyim ya governance system aser nübur tenzükba nung technology amshiba tsütsü alizüng tasen ka alitsü, ta Dr. Zasekuolie Chusi, IAS ajanga ashi.

Mapa inyakyim mapang shia tajungba kuma yanglushitsü nungdaker aser transactions aser services ajak digitization akumtsü nungdaka kumogo, ta pai ashi,

Iba service semzükba ajanga nüburtemi motor vehicles services dak sendakba taxes aser fees ajak Debit Card, Credit Card, UPI QR Code den Google Pay, PhonePe aser Paytm amshia digital yimya nung senotsü agütsütettsü.

Kohima nung Honda Power oset indang authorized dealer lapokogo



Kohima, Chiteni/July 24 (TYO): Kohima nung mapang talangka nungi kanga nungdaka aliba Honda India Power Products Ltd. (Sales, Service & Spare parts) indang authorized dealer ka tanü State Chief Information Commissioner, I. Meyionen Jamir-i Kohima nung Naga Hospital anasa semzüktsüogo.

India nung No. 1 Power products company, Honda ajanga Nagaland Power Solutions & Machineries ya Kohima nung par official Dealer asütsü shimba atema Meyionen Jamir-i pelaba lemsatapa liasü.

Iba Nagaland Power Solutions & Machineries indang kibur Imsujungla Jamir aser la kinungbo Tiasunep nati iba ama company tajung Kohima-i bener

arutetba asoshi tenüngsang agüja jembidang, parnok ya nübu tejangja aser tetemsü lir, aser parnok ya Naga nunger entrepreneur aser business tasen tenzüktsü tejangraba nung lir, ta ashi.

Nagaland Power Solutions & Machineries inyakyim tasenba nung takok lidakjang ta pai moatsü.

Honda indang Chief Manager, Pranmoy Bordooi aser Deputy Manager Rupam Ojah natia iba sentong nung Honda Power products tem anguba indang lemsatapa liasü.

Iba sentong nung Zulutila menden liasü aser KABA Pastor Arep Tzudir-i sarasadem aser Nagaland Power Solutions & Machineries kibur Tiasunep-i melepzüng o jembia liasü.

KOHIMA AOR PENSIONER TELUNGJEM TANABUBA INTI SENDEN

Anogo : July 26, 2024
Mapang : Anüngdang 11.00 ako
Tesentepdak : Molu Ki, Merhülietsa

Menden - Ketdangpurtem

- * Tarurtem Pela Agizükba aser Okila - Dr. Watijungshi, Tir KAPT
- * Lai zünger Sarasademtsü - Rev. Bendangmeren
- * Tayongzükba O - Tebu-teti Er. Lanu Toy Rtd. Chief Engineer, Power Dept.
- *Temeja Ken - Tayonger :
Wt. Tiamenla Imchen & Wt. O. Chubala
- * Onük - Temang, Shisatsü aser Loktilibaren ajak nung koda anema alitsü (How to live a Healthy Life - Physically, Mentally and Socially)
- Tejembir - Dr Tali Longkumer, Consultant Gastroenterologist, Dimapur
- * Osangtem agitsü 1) Tongti Zülur osang
2) Senotsü osang
- * O Lemtep Mapang - Wb. Tekatushi Ao, Rtd. Director Agriculture
- * Tatem sarasadem

~ ~ ~ High Tea ~ ~ ~

Temetettsü: -

- Iba sentong nung KAPT züngsem ajak arua atentsü pelashishia jaoker. Gari ayudak (parking) volunteers temi yaria Molu Ki temeket nung ayutsü sadema lir, anungji ajak meratai arutsü metetdaksür.
- Züngsem kar züngsem saru magütsüi lira iba sendeni arudang agütsütsü metetdaksür.



July 24, 2024 nū New Delhi nung Lok Sabha nung Opposition lenir, Rahul Gandhi, Congress MP Sonia Gandhi aser opposition MP temi Parliament kima Union Budget 2024 anema longkak aitdang tangokba noksa nung angur.

Budget nung state ajak tenüng tetshitsü makok: Nirmala Sitharaman

New Delhi, Chiteni/July 24 (Agencies): Opposition party temi, Union Budget 2024 nung Bihar aser Andhra Pradesh na dang alakteta züngshiogo, ta aitsüba dak sendakba nung Bodhbarnü Union finance minister, Nirmala Sitharaman-i, budget benokba shia iba linük nung aliba state ajak tenüng tetshitsü makok, ta metetdaksü. Opposition-i Budget nung state tem bendangshidanga züngshi, ta aija longkak aitba mapang nung Rajya Sabha senden nung Nirmala Sitharaman-i, "Budget benokba shia iba linük nung aliba state ajak tenüng tetshitsüa nai maongka mangutsü," Cabinet-i

Vadavan nung port ka amenoktsü atema telemtetba agiogo. Ajisüaka yashi budget nung Maharashtra state tenüngbo metetshi. Iba tetezü Maharashtra sendok, ta bilemer asü? Budget onük nung state ka tenüng tetshira, iba tetezü tanga state tem nungbo India sorkar indang sentongtem mebenoktsü, ta züngshitsü asü? Iba ya Congress party leniba nung Opposition-i metetsümonga nüburttem dang, onok state nem bo kecha magütsü, ta bilemdaktsütsü atema inyakba lir. Yamai tai tongloktsüba ya tejashitsüka lir," ta ashi. Ano külen Rajya Sabha

nung opposition lenir, Mallikarjun Kharge-i, "Modi sorkar budget nung state shingai kecha mangu. BJP sendokba state temi iba budget nungi kecha mangu! Ajak auso tazüing, aser state ana (Bihar & Andhra Pradesh) auso nungbo Pakora aser Jalebi lir. Iba budget ya pa menden kümzüktsü atema benokba lir," ta ashi. Kharge-isa, state tem tsüingda liro memedemra terenlok malitsü, ta ashi. Senden nung telangzüba agütsütsü atema Sitharaman nem mapa agütsüdang Kharge leniba nung opposition züngsemtemi longkak aita senden nungi ayazüka lua liasü.

Kiralongrartem Jail-i yoktsü mesüra molumi-i yoktsü: Nityanand Rai

New Delhi, July 24 (Agencies): Tawa Jammu & Kashmir nung kiralongrartemi tesem balala kanga bulua amakba mapang nung Bodhbarnü Rajya Sabha senden nung jembidang Minister of State for Home Affairs, Nityanand Rai-i, Jammu & Kashmir Union Territory nung aliba kiralongrartem jail-i yoktsü mesüra molumi-i yoktsü, ta metetdaksü. Rajya Sabha nung Congress MP, Pramod Tiwari-i asüngdangba langzüdang minister Nityanand Rai-i, "Tawa kiralongra tatalokbatem ya kobi melii tembangtsü. Parnok asalentongji takok mangutsü,"

ta metetdaksü. Tesüiba anogo 45 tsüingda Jammu region nung kiralongra dak sendakba tatalokba 15 liasü aser item tatalokba nung sepai ketdangser ana densema sepai 10 aser temeshi ainlen jajar 9 süogo; iba dak alia nisung 58 yiruogo. Nityanand Rai-isa, tesüiba anogo ishika tsüingda Jammu & Kashmir nung kiralongrar 28 tepsetogo aser security sepaitema kar asüba atema sasar, ta metetdaksü. Paisa, 2019 küm Jammu & Kashmir nung Arlla 370 agienba sülen iba region nung security sepaitemi kiralongrar 900 shi tepsetogo, ta metetdaksü. Rai-i, "Modi sorkari

kiralongra khenyongi magizüketeter. Onoki kiralongra anentsütsü. Parnok jail nung puoktsü mesüra molumi-i yoktsü, ta ni House dang nangzükter," ta ashi. 2019 küm Jammu & Kashmir nung Arlla 370 agienba sülen Jammu & Kashmir aser Ladakh union territories tenteta liasü. Rai-i, 2004 küm nungi 2014 küm tashi nung J&K nung sensotem aser sepai 2,829 asü saka 2014 küm nungi tenzükü nüburt aser sepai asüba shilem 67 agi tajemba kümogo aser kiralongra tatalokbatem-a shilem 69 agi tajemba kümogo, ta metetdaksü.

Yimtenren tsütsü bendanga züngshira na sendoktsü: MK Stalin

Chennai, Chiteni/July 24 (Agencies): Bodhbarnü Tamil Nadu Chief Minister, MK Stalin-i Ato kilonser Narendra Modi dang, yimtenren tsütsü nai saklokba mesüra mesaklokba apia yimsü süra na sendoktsü, ta Stalin-i metetdaksü. Union Budget aija Stalin-i Ato kilonser dang, iba budget ajanga nū mendenbo kümzüktsü saka linükbo mekümzüktsü, ta ashi.

mebilemstüla, ta ashi. "Ni nū dang ya sayutsüingitsüsa akümer- yimtenren tsütsü nai saklokba mesüra mesaklokba apia yimsü süra na sendoktsü," ta Stalin-i metetdaksü. Ano külen Davida Munnetra aser kija akümstü, ta metetdaksü. Kazhagam nungi MP, Dayanidhi Maran-ia, Ato kilonser Modi-i Stalin-i inyakba ama inyaksüla, kechiyong Stalin-ibo pa nem vote magütsürttem atema-a inyaker, ta ashi.

Mongolbarnüa Stalin-i, Union Budget nung Tamil Nadu khenyongi sendokogo, aser ibaji aitsütsü atema pai July 27 nū Delhi nung ayongzükä aliba NITI Aayog senden nung madentsü, ta ashi. Stalin-isa X ajanga INDIA teloktep nungi lenirtem Parliament kima longkak aitdang tangokba noksa ka lemsatapa, "Union financial report nung state aika sendokba anema #INDIA teloktep nungi MP temi longkak aiter," ta metetdaksü. Paisa, "Ato kilonser @narendramodi... nai, "Election tembangogo, anungji asenoki linük atema bilema inyaksüla" ta jembia liasü. Ajisüaka yashi benokba #Budget2024 ajanga nū yimsüsüba kümzüktsü saka India linükbo mekümzüktsü," ta metetdaksü.

Union Budget nung Tamil Nadu khenyongi sendokogo, aser ibaji aitsütsü atema pai July 27 nū Delhi nung ayongzükä aliba NITI Aayog senden nung madentsü, ta ashi. Stalin-i, 'minority BJP' agi 'majority BJP' kümdaktsüba regional party kar temelung südaktsütsü nükjidong nung sorkari Budget nung state kar (Bihar aser Andhra Pradesh) atema schemes kar sangdong, ta metetdakja liasü. Tamil Nadu nung opposition, AIADMK-ia Union Budget ya tejashitsü tuluka lir, iba budget ya BJP den teloktep party temi yimsüsüba state kar melung südaktsütsü atema renemba budget ka lir, ta aitsüogo.

Stalin-i Modi dang, na tamakok ngudaktsürttem anema nai mangyangtsü atema



July 24, 2024 nū Jammu nung sepaitemi asür Lance Naik, Subash Kumar nem akhüm agütsüdang tangokba noksa nung angur. Jammu kübok Poonch district nung kiralongrartem den raradang pa yiruba sülen mekümzüktteti asü.

P Chidambaram-i sorkar nem takhangba onük 5 agütsü

New Delhi, July 24 (Agencies): Mongolbarnü Finance Minister Nirmala Sitharaman-i Union Budget 2024 benokba sülen anogo ka lir Rajya Sabha senden nung jembidang Congress MP, P Chidambaram takhangba onük pongu agütsü. Chidambaram ya Congress-i aniba UPA II sorkar mapang Finance Minister inyaka liasü. Chidambaram-i BJP dang anogo ka aayangba taa ishiba agi sen 400 kümjang aser aluyimertem nem Minimum Support Price (MSP) agüjang, ta takhangba agütsü.

takhangba agütsü. Chidambaram-isa Finance Minister Sitharaman dang, Congress party indang election manifesto nungi ano kar ajizükang, ta ashi. 2024 Union Budget nung Congress indang election manifesto nung aliba schemes kar inoksema lir, ta aitsüba mapang nung Chidambaram-i iba o ya jemiogo. Chidambaram-i, item takhangba ya tekeraba nung atalokdaktsüner aser t a s ü n g d a n g b a t e m langzüdaktsüner, ta metetdaksü.

Paisa Centre srokar dang, 2024 küm March ita tashi nung education loan magütsüi aliba nungi sen tetemlok atoktsüla, Agniveer scheme agientsüla aser NEET agientsüla ta

melangzü tashi aser item takhangba ya nenoki mataloktsü tashi iba takdang nung dang masü saka linük tesem ajaklen ayimdensü," ta pai metetdaksü. "Item tasüngdangba melangzü tashi aser item takhangba ya nenoki mataloktsü tashi iba takdang nung dang masü saka linük tesem ajaklen ayimdensü," ta pai metetdaksü.



July 24, 2024 nū Surat nung tzünglu kanga sashia aruba sülen iba district kübok yimtsüing ka nung tzü agi ki aika metsüngbanga aliba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, JULY (CHITENI) 25, 2024

Taküm Budget ya koma ?

India ajunga atema tang nungi sangküm 2025 March ita tashi 'Union Budget 2024-25' atema sen ajak agi crore lakh 32.07 benogo . India linük ya kanga tuluka aser nütsünga crore 144 dak tali kümogo, anungji nübertem chiyongtsüba nungi tenzüker pi bendanger tsükchir ket nungi kümzüka alitsü asoshi renema alitsüba mapatem tashi nung sen aikasa nungdaker. Atangji, sen agibo tagishi maka aser tenüksünga makatsü saka sen croresa lakh semer anajia sen aika asütsü. BJP telok asema state, talisa, Bihar nembo sen crore meyrirjang 60 aser aser Andhra Pradesh nem sen crore meyrirjang 15 ta balaka mejeteta lemkükja lir. Aji oda, BJP teloki aniba NDA telok nung adener state-temi taküm küm benokba senotsü sentongji junger ta ashiba aser BJP telok anemer Opposition teloktemi majunga ta ashibaji yimten nung yimya dang lir. Atangji, kasa linük nung state kar nembo sen crore noklang ta masü saka crore meyrirjang ta lemküksür karbo tenünga metetshi yutsübaaji tim masü, iba jagi pei government nung alir state-temang India kübok alir amai sayur. Ajisüaka, linük ajak asoshi renemba sentong nung sensakertem rongsen jenjang ajungkettsütsü, lanurtem nem mapa agütsütsü aser tetsürtem jenjang tajungba kümdaktsütsü asoshi sentong balala ajanga senotsü agi yaritsü asoshi lemkükja alibaji state ajak asoshi lir, anungji state government nung yimsüsür, ketdangser aser inyakertem dak tuluka keta lir. Taküm linük senotsü sentong nung tongtibangsa bilema senotsü lemküksübaaji aluyimba nung lemkükja lir aser taruba küm ana tsüngda aluyimer crore ka shimteta aluyimba nung yaritsü aser alu nung züsentetba tamajung mekümdaktsüi ayutsü atema tayudak aser tayokdak lenmang bushia yaritsü government senotsü sentong nung shisema lir. Iba denji ano tajung kaji lanurtem dang mapa inyak sayuba nung government-i temulung agüja inyaktsü. Iba sentong atema industry tulu den jembitepa lanurtem mapa angazüki yoktsü aser linük nung tang aliba Industriai Trainung Institue meyrirjang ka tuluba kümdakja mapa tapu balala angazükdak kümdaktsütsü. Iba amaji peisasa mapa tenzüka inyakner aser Industry lapokner atema MSME sentong nung Bank ajanga senotsü lenmang lapokja yariteptsü asoshi sentong nung enokja lir. Atangji, itemji angati mapa meinyaki agizüka agitsüba sen masü, anungji mapa inyaktsü sentong shitak yanglutettsüla aser inyaktsüla. Aji oda, asenok Nagaland ama state asoshia senotsü balaka lemkükja meliaka, linük ajunga atema lemküksüba nungji asenok shilema lir. Ano asenokbo tangar dang nungi balaka 'tribal' aser 'scheduled tribe' ta asüba teküpbok jenjang nung aliba teloktem rongnung densema lir, anungji asenok asoshibo senotsü balaka lemkükja lir. Item senji pasasa odang arutsüba masü saka asenoki bushia aotsüla. Aji oda, aluyimertem asoshi aluyimtsü atema senotsü lemküksübaaji shitak agizüka agitetsü atema Nagaland government nung Agriculture, Horticulture, Water Resources, Land Resources, Veterinary & Animal Husbandry, Fisheries aser Forest department amatem nung inyakertemi komaka item sentongtemji aluyimertem nem metetdakja tesayuba aser tangatetba agütsür aser kechikoma sentong ka Nagaland asoshia yanglur oa Delhi nung jembir ta asüba dak keta lir. Kasaji, tetsürtem aser lanurtem aser tribal atema lemküksüba senjia Nagaland nung Tribal, Skill Development, Women Development, Youth Resources aser Industries department-temia lanur aser tetsürtem nem koba tashika item sentongtem dak aketba tangatetba agüja lenmang sayur aser Nagaland dak apet kechikoma sentong yanglur oa Delhi nung jembir ta asüba dak keta lir. Aji oda, asenok asoshi Delhi nung India government ket nung sen mali masü saka asenoki sentong shitak yanglua meshitetter asü memeshitetter ta asüba dak dang keta lir. Asenok dak tashimait aser tezüdangtsü kaji, asenoki center sorkar sentongi aginüba ama sentonga junga meyanglutetter aser yanglubatem asoshia mapa tenzüksü sen teraka meshir, mapa tenzüka inyakba aser mapa renemba kuli mesayuteter, anungji tanünga sen memeshitet takoksa ajurur. Aji oda, Nagaland asoshibo NDA budget mesüra UPA mesüra INDIA bloc budget ta mali, asen mapa jungra budget tajung asütsü aser asen mapa mejungra budget-a majung asütsü.

OLEMSABANG

LOKTI NUNG LENNIR KATI PEI KHURET ANGATETA TENZÜKTSÜLA

~ L.Kika Pongener.

Tanü alima kanga renloka tejakleni aoba putu ka nung, loktiliba ajunga nung tanishir (Leader) asütsü kanga temelabo masü khuret tulu lir. Aji oda, shirnoki lokti nung teka amuoka khuret bena tenzüker parnoki dang tajungba meteta alitsü. Lokti nung tenzü-aka, shirnoki khuret mebeni, lokti atema tebilemstü kecha maka, züba-züba-a tenzüker parnok asoshibo kecha khuret makatsü akok. Ajisuaka, shiba sudir suang, lokti ka nung lennitsü shilem agi atabaji züba-zübaa masü, saka khuret bena tenzüksüla. Lokti ka nung lennir ka khuret kecha maka, tenung agi dang tenzükra, pai/lai nubur nem tajangzük kecha magütsütsü. Tanü ama tashitemeteter putu ka nung, nubur nem tajangzük magütsüba lennir kaji, tanü lima asoshibo tetemsu lennir ka masütsü. Na aser ni lokti nung lennitsü shilem agi ata-a tenzükbaji tsüngnep/tsüngsu tila-kabo akatsüla. Lokti nung küm aika lennir ka ama tenzüka arur asen tenzükbaji tsüngnep aser tsüngsu-mong makara asen tenzükbaji kecha tetezü makatsü. Lokti nung lennir karbo pei tebilemba atalokdang mulongsoa tenzüksü, saka pei taginuba kar matalokra züba-zübaa senzüka toktsüba lennir karbo lir. Ano lennir karbo pei tajangzük akaba mapa nungbo temulong agüja nendak-nendaka inyaktsü aser adentsü, saka pei tajangzük maliba mapa nungbo nendak-nendaka temulong agüja meinyaktsü aser madentsü ta asüba lennir karbo lir. Iba ama lennir jagi nubur nem tajangzük kecha magütsütsü. Anungji lokti lennir ajaki, na aser ni tenzükbaji menden tazung mayutsü atema tapok atanger ka dangbo masütsüla. Lokti nung tenzükbaji konang-nungsang aser tajangzük dang masü, saka nungsen aser khuret dena lir. Lokti lennir kati konang-nungsang aser tajung dang agir, nungsen-nungmen arudangbo pei tenzükbaji menden wazüka meyutetra, pa/laji lennir tajung ka masü. Lokti lennir kati lokti ajungtsü asoshi nungsen arema tasü-ita jembitsüla. Lennir kati tensa tajung aser tamajung ajak nung pei tenzükbaji menden meraketa wazüka ayutsüla.

Atangji, tanü putu nung yimden, arogo aser loktiliba nung tanishir (Leader) asütsü kangabo temela masü, idakji nubotsük lir, saru-molok lir, tenla-tenji lir, nungsen aser lokti nungdak aeinlen senudang memeteti kibong sensak atener. Ano lokti nung lennir asütsübaaji, tenung agi nia denogo, nia shilem agiogo, nia jembigo, nia tenzükogo...ta konang kuma jembitsüba masü, saka asen adenba, aseni shilem agiba, aseni jembiba aser asen tenzükbaji jagi nubur asoshi tajangzük agütsür asü (?) Mesura asen ajangzüktsü atema dang tenzü (?) Lokti ajangzüktsü mechi nung asen tamajung agia, nungsen agia jembi asü (?) Mesura nungsen maginuba agi mangashi aser mangu amai külem tenzüker toktsür atsüngena ata (?) Lokti ajangzüktsü asoshi asen nubu tenla agüja tenzü asü (?) Mesura taki-tarutsü aser tachi-tajemtsü nung dang rangloker tenzü (?) Ajak dak alaka, lokti nung lennir kati metettsüba kanga tongtipang kaji...Asen ata-a atongoka tenzükbaji mapang asen loktiji sunep-sunepa longjema aliba aseni anir raksa asü (?) Mesura raksar aliba aseni anir yanglua yutsü (?) Lokti lennir ka atema aji kanga tongtipang lir. Anungji asen ata-a atongokba mapang, lokti inyakim junga inyaka aruba ajak pai raksa ta nuburtemi asen tenung tetla-tetshi masütsüsa kümdanga tenzüksüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Harvest Crusade 2024 nung nisung 3,500 dak temai Khrista agizük



July 21, 2024 aonung Anaheim, California nung aliba Angel Stadium nung ayongükba Harvest Crusade nung tangokba noksa nung angur.

July 24, 2024: July 21, 2024 aonung Anaheim, California nung aliba Angel Stadium nung ayongükba Harvest Crusade nung nisung 50,000 dak tema aden aser nisung 3,500 dak temai Yisu Khrista agizüka liasü.

Pastor Greg Laurie-i iba sentong nung Tsüngrem O jembia liasü.

Stadium sünga nisung adenshiba sülen Fire Marshall-i stadium kishi ajak shibangtsüsa aküm saka stadium jara adenera nisung aika adenshia tekülem nung aden.

Pastor Greg Laurie-i, "Harvest Crusade nung adentsü atema yasüng Angel stadium sünga nisung adenshia liasü, ibayongji Fire Marshall-i stadium kishi ajak shibang. Ajisüaka stadium kima lokti mesenshii tekülem nung aden. Tesüngmangtsü!" ta metetdaksü.

Harvest Crusade nung nungtugu osangtajung kentener-tem- Brooke Ligertwood aser Chris Tomlin nati tekülem aser tetushi ania liasü.

Pastor Greg Laurie-i lokti

dang temelung meyiptsü aser Ysiu Khrista ajanga Tsüngrem dangi arutsü atema sayutsüngia liasü. Iba sentong nung nisung meyrjang aikati Yisu Khrista nem taküm bendanga agüja sabang tejakleni ao.

Khrista nem taküm bendanga agütsür ajak pelaa agizük aser Khrista den taküm tasen tenzüksü atema Laishiba kaka lema agütsü.

Iba crusade tembanga Phil Wickham-i kenten sentong ka ayongzükba agi. Pa leniba nung tekülem kentem atenba mapang fireworks ajanga anüng ajak sangwatsüdang nisung aikati Khrista agizük.

Tesülen Phil Wickham-i Instagram ajanga, "Taonung kü tembar tajung @brookeligertwood! den külemi @harvestcrusades nung temoatsü ngua denogo. Nisungtem Yisu matsüngdangi aruba atema benjungba ama benjung tajungtiba mali," ta lemsatepa liasü.

Iba sentong nung nisung 50,000 dak tema aden aser nisung 3,500 dak temai Khrista nem taküm bendanga

agütsüba sülen Pastor Laurie-i, "Parnok tanela nung aintsü atema asenoki parnok asoshi sarasademtsüdi," ta ayongzük.

Tesülen Pastor Laurie-i X ajanga, "Aonung tajung ka! Angel Stadium sünga nisung adenshi. Nisung meyrjang aika telungi maittettsüsa aküm. Ano alima tesem balala nungi nisung meyrjang aikati online ajanga iba sentong nung aden. Harvest Crusade ya nisungtem Khrista dangi anitsü mangdang yur ayonger. Nenok sarasadem aser teyari atema pelar. Tsüngrem dang sentsüwangshi süang," ta lemsatep.

Pastor Greg-i, "Nisungtemi California sendokner saka Tsüngremibo asen state ano mesendok. Tesüsabuba asentenshi milak tulutiba-Jesus Revolution yangi (California) tenzükba liasü. Ano yangisa asentenshi milak tenzüksü atema ni sarasadem," ta metetdaksü.

Harvest Crusade ya taruba Honibar tashi agitsü. Iba anogo nungji Newport Beach nung aliba Pirates Cove nung baptiba sentong agitsü.

Benue State nung Fulani kiralongrar teloki Khristan 18 khaset

July 24, 2024: July 19, 2024 aonung 11:00 ako nung Islamic Fulani teloki Benue state nung Katsina-Ala local government area kübok Mbacher yim amakdang Khristan 18 khaset aser aika yirutsüogo, ta International Christian Concern (ICC)-i metetdaksü.

Fulani kiralongrartem jagi yimdaklir ajakji tesem ka nung adenshidaksüba sülen tanga tesem kati anir ao aser parnok dak injang khaloktsü.

Katsina-Ala local

government area nung chairman, Justine Shaku-i, "Ni ilonga Tor Doonga nung aliba sepaitem ayongdena liasü, ajisüaka kanga tezülen aliba tesem asüba ajanga parnok iba yim tonga aodangbo nisungtemji khaseter liasü," ta metetdaksü.

Shaku-isa, iba ya Khristantem samatsütsü nükjidong nung inyakba lir; iba ya kiralongra lir, ta metetdaksü.

"Joko ni parnok dang auer

telok ta majatsü, kechiyong ni parnok inyaksangshi ajak ya kiralongra ama asadangteter. Tangbo parnok ya kiralongrartem, ta ni züngshir," ta paisa metetdaksü.

Hopta ishika tejaklen Benue state kübok Ayati nunga Khristan 11 tepseta liasü.

Tawa Nigeria tesem balala nung telok balalai talisa Khristantem amaker, ta International Christian Concern (ICC)-isa metetdaksü.

ANO GO ABEN TSÜNGREM DEN

Khrista nung aliba

"Kechiaser Khrista den ni kangki nung angenlokogo, aser ni joko taküm mali, saka kü dak Khrista taküm alir aser Tsüngrem chir, shibai ni meim aser pei sasa ni atema taküm tenla agütsü, pa dak tamang agi ni taküm alir" (Gal. 2:20).

Mamanger ajak dak temenen jakla yimya keta lir. Na Khrista dangi marudang ne daka iba jakla yimya keta liasü. Na temenen nisung ka kechiaser temenen menatsü yimya ne dak keta liasü. Iba yimya nisung jagi Tanela mapa angatetsü makok (1. Kor. 2:14).

Tekümtet angu dang ne tejenba taküm dak kechi atalok ? Na asü- ne temang masü, saka telung nung tejen yimya koba Adam nungi aruba senmang liasü, aji asü (Rom 6:2-6; Ko1. 3:3). Iba tepsetyimji kechi ? Kangki nung Khrista den asüba (Gal. 2:20). Khrista kangki dak alema kecha moulutsü ta Pauli ashi (Gal. 6: 14). Tekümtet ajanga na Khrista nung lidaktsü, shiba ne menen atema kangki nung asü. Khrista nung aliba ajanga ne tejen taküm kangki nung pa den süogo.

Adam nung na temenen yimya keter liasü (Ef. 2: 1-3); Khrista nung na Kibuba den shilem agir aküm (2 Peter 1:4).

Adam nung na shi nung liasü (Rom 8:8); Khrista nung na Tanela nung lir (Rom 8:9). Adam nung nai shi sülen jaja; Khrista nung na Tanela sülen sülen jajar.

Khrista nung taküm tasen ka alitsübaji koda tepelatsü ! Yisu, Nai ni temenen talenba nungi salatsüba asoshi ne tenüng asanger. Amen.

Central India nung ita ka tsüngda Khristantem asemben amak

July 24, 2024: Tan ita kija arua tensa azüok aser loktiji nung Central India nung aliba senshidakja liasü.

June 23 nüa tamalen Hindu nungertemi Khristantem amakba tesem nungjagi mile amak; tatalokba ka nungbo pezü shi pilar aliba tesem ka International Christian Concern (ICC) staff-a ka amanger telok kati tekülem densema liasü, ta ICC-i sentong tagidak mapang nung pastor ka dak azük.

July 10, 2024 nikongdang Khristantem tekülem ICC staff ka par kidangi sentong tagidak mapang nung shilangba mapang nung Hindu loktiji Tenla ki telungi aitba nung telok kati pa soit aser sülen Khristantem dak azük.

Tenük kuli alirtemi ashiba agi, lokti jagi pastor tepsettsü asüngdangya aser tebilemba liasü saka yangji alir amokmerena liasü. Parnoki pa kati yarisemba ajanga pastor dang, onoki nü dak tenük yoka jena otet.

Yangji alir Khristan kati, ta shia amokmeren saka "Hindu yimsü wazüka ayurtem, ta shia yimsü alia amangertemi Khristantem anema inyaker. Tang Hindutva züngsem 50 dak Khristantem yamai amokmerenba ama ya ni amokmerenba ama ya ni Lokti jagi arrshi küm 60 kodanga mengudang," ta tantsür ka densema metetdaksü.

July 13 nüa Arogo kati ayongzükba sentong ka nung anema inyaker. Tang Hindutva züngsem 50 dak Khristantem yamai amokmerenba ama ya ni amokmerenba ama ya ni Lokti jagi arrshi küm 60 kodanga mengudang," ta tantsür ka densema metetdaksü.

Police-i item tatalokba Khristantem dak azük. Lokti jagisa Khristantem bushisüngdangdar aser ICC-ia adenshiba tesem nung aliba maneni iba region nung menden aser tanga osettsüset reshikangshiba Khristantem balala raksatsü. Tesüsa police yarisü, ta ICC-isa metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Takmi

(v) nükmen aibelen, junga metaktet (mistaken in weaving, basket making)

* Junga mangazük ser molok atakba agi takmi.

Takok

(v) mapa junga renemtetba (victory, success)

* Aor lanurtem aikati NPSC tatidang nung takok nguogo.

OLONG PAITEP # 6855

	1		2			3		4		5
6								7		
					8		9			
			10							
11										
					12					
13		14		15						16
17										18

TIPLIN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ___ hi - (3)
- 16. Akümlü nungi pilar - (3)

OLONG PAITEP # 6854 TELANGZÜBA

TIPLIN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Alima nung küm 84 sülen anogo tatsüktribaji July 21, 2024 nü liasü. Iba anogo global average temperature 17.09 degrees Celsius (62.76 degrees Fahrenheit) liasü. Alima nung tatsüktriba anogo ta asadangtetbaji 1940 nung liasü. Iba osang ya European Union nung Copernicus Climate Change Service (C3S) ajanga metetdaksü.

Scientist karibo 2024 ya tatsüktriba küm asütsü akok kechiyong climate change aser El Nino natural weather phenomenon ajanga taküm temperatures tatsükba kümdaktsüogo ta ashir.

India sorkar aser KLO tsüingda yimjung olemtep tatemleni arur

Guwahati, July 24, 2024

(Agencies): Assam nung Kamatapur Liberation Organisation (KLO) aser India sorkar tsüingda yimjung olemtep tatemleni arur ta KLO-KN chairman Darsar Langkam Koch-i ashi.

"Joko formal declaration ka dang anünga lir" ta KLO-KN chairman Darsar Langkam Koch-i ashi.

KLO chairman Jeevan Singha Koch-i anir India sorkar den yimjung olemtep nung KLO-KN teloki tamasabo adentsü memulungi liasü.. Ajisüaka taküm June 18 nü KLO-KN chairman Darsar Langkam Koch India-i aruba sülen Singha

lenisüba kübok yimjung olemtep nung aden.

"Onoki India sorkar den olemtep tatemleni arudar aser formal declaration dang atar" ta Koch-i ashi.

KLO-KN-i Prime Minister Narendra Modi aser Union home minister Amit Shah na dang parnok asoshi permanent solution agütsütsü ayongzükogo.

Centre sorkari olemtep alitsü jaokba KLO chairman Jeevan Singha Koch-i January 17, 2023 nü India telungi aitba sülen agizüka liasü.

Iba sülen KLO foreign secretary Koch Paval-ia March 15, 2023 nungi olemtep nung

aden.

Koch Rajbongshi nunger lokti tetet 28-i Ministry of home affairs (MHA) ketdangsürtem den jembitepa aruba sülen KLO chairman Jeevan Singha Koch dang onük pungu nung ajemdaker yimjung olemtep tenzüktsü shia liasü.

KLO takhangbatem rongnung Assam aser West Bengal nungi tesem kar agiteta Kamatapur ta ser state balaka akümtsü dena lir.

Parnokisa Constitution of India nung eighth schedule nung Kamatapuri oshi dendaktsütsü aser Scheduled Tribes (Plain) category nung Koch Rajbongshi nunger züngsemtsü akhanger.

Arem shidi ka asüba miimbangba atema NRL ketdangsür 2 apu

Golaghat, July 24, 2024

(Agencies): Arem shidi ka taittsü keta asüba dak sendakba nung Golaghat forest department-i Numaligarh Oil Refinery (NRL) nung ketdangsür ana puogo.

Golaghat Regional Forest Officer indang office nung asüngdangya asüba sülen Chief Manager of Urban Areas Ujjwal Nayan Sandikai aser

Manager of Urban Areas Bedanga Kashyap na apu.

Arem shidiji July 18 nü NRL-managed town nung ligh agi puset aser ketdangsürtemi forest pur dang mashi miima dang arem.

Forest department-i osang ka angazükba sülen shidi mang tutet aser post-mortem examination agi. Iba sülen Golaghat forest

department-i Wildlife Protection Act of 1972 kübok bushisüngdanga aodang Handique aser Kashyap na dak tai tongloksü.

Iba tatalokba atema ashishitep ken k a adokogo aser linük nung telok aikati Numaligarh Oil Refinery anema ken o tem benokogo.



**GOVERNMENT OF NAGALAND
DIRECTORATE OF INDUSTRIES & COMMERCE**



NAGALAND : KOHIMA

ADMISSION NOTICE

Applications are invited from eligible candidates for admission to the following 3-Year Diploma Programmes (AICTE Approved) for the Academic Session 2024-25 at Nagaland Tool Room & Training Centre(NTTC), Dimapur.

S. No.	Name of the Course
1.	Diploma in Mechanical Engineering
2.	Diploma in Computer Science & Engineering

ELIGIBILITY:

Matriculation or Equivalent Examination from a recognized Board.

AGE CRITERIA:

Between 15 to 22 Years (relaxable to 25 Years for SC/ST Candidates)

SALIENT FEATURES:

- AICTE approved & ISO certified.
- 70% & above in Matriculation/ Equivalent – Direct & Free Admission.
- Eligible for scholarship under State/ National Scholarship Portal Scheme.
- Incentives from the Institution for the Meritorious Students and Attendance Toppers.
- Well equipped Lab and workshops for Practical Classes.
- On campus TOYOTA training facilities.
- Opportunities for technical skill enhancement through different Govt. schemes.
- Educational Tour, Industrial Trainings & Internships.
- Seminars & Workshops conducted by experts in the related field.
- Academic Collaboration within & outside the State.
- Industry Collaboration with reputed Companies for 100% Internships & Placement Assistance.
- Access to Incubation centre, mentors and expert for students interested in Entrepreneurship.
- In campus Hostel seats available on first come first basis.
- Safe, hygienic & green campus with ample parking space.

Forms will be available at the Office of NTTC, Dimapur on all working days from 9:00 am to 4:00 pm. Application Form may also be downloaded from the website. <https://nttcdimapur.org.in/>. In which case the fee of Rs 100/- only may be deposited while submitting the form.

FEW SEATS AVAILABLE
Apply on or before 31st July 2024
On-the-spot Interview

For further details, visit the website: <http://www.nttcdimapur.org.in> or contact the following Course Coordinators: 8787383944/ 8837319366/7005162525. (Reception desk: 7005876150)

Sd/- P. Tokugha Achumi, Director Industries & Commerce Deptt.

**GOVERNMENT OF NAGALAND
DIRECTORATE OF INDUSTRIES & COMMERCE
NAGALAND : KOHIMA**

ADMISSION NOTICE

Applications are invited from interested candidates for admission to different levels of **Diploma (Voc)** for the Academic Session 2024-25 at **Nagaland Tool Room & Training Centre (NTTC), Dimapur**. The courses are aligned with NSQF under MSDE through Community College Programme approved by AICTE, MHRD. Course duration upto 3(three) years are mentioned below:

S.No	Name of the Course	Diploma (Voc)	Duration	Eligibility
1	ELECTRICAL <i>Specialization in Electrical Equipment Maintenance</i>	NSQF Level-III	1 Year	Class X pass and above
		NSQF Level- IV	1 Year	NSQF Level III Pass
		NSQF Level -V	1 Year	NSQF Level IV Pass

Application form is issued at **NTTC Office, Dimapur** on all working days (9:00 AM to 4:00 PM)
Apply on or before 31st July 2024

IMPORTANT INFORMATION:

1. Students are eligible for scholarship under State/National Scholarship Portal (NSP).
2. Registration fee Rs. 100/-
3. 100% Placement Assistance
3. Hostel seats available.

For further details, contact the following enquiry numbers
8837319366/7005162525
(Front desk — 7005876150)

Sd/- P. Tokugha Achumi, Director Industries & Commerce Deptt.

Website: www.nttcdimapur.org.in • Email-ID: nttcdimapur@gmail.com
NTTC, New Industrial Estate, Sub-Jail (Tinali), NH-36 Diphu Road, Dimapur, Nagaland

Trump jakla ni kanga junga meteta lir: Kamala Harris



Milwaukee, Chiteni/July 24 (Agencies): United States tir election nung Donald Trump den tokteptsü atema renema lir ta Kamala Harris-i nenshia ashi. Lai iba o ya White House asoshi mezüngbuba nübuyim sentong nung jembia liasü, shiba Democratic nominee angutsü teimla lir.

Mongulbar nikongdang Wisconsin state nung nisung telok ka den jembidang US tatong tiri Democratic Party lungjemtsü nangzük aser ibaji ajanga asenoki November ita

takok angutsü renema alitsü ta ashi.

“Election Day atongtsü anogo 105 dang lir aser iba mapang asenoki inyaksü mapa kar lir. Ajisüaka asenok mapa meranga inyaksü tsüboa mali. Aser asenoki iba election nung takok angutsü,” ta Harris-i ashi.

Tir Joe Biden arishi küm nung tain akumba ajanga ano kümsük ka inyaksü temulung melemi hopta aika jembia arur taoba hopta tatemlen pai 2024 election nung pa metokteptsü ta sangdonger anogo ana lir

Milwaukee nung iba rally ya ayongzükua liasü.

US tatong tir ya tang tashi Democratic Party indang presidential nominee asütsü jangja mali, ajisüaka Harris-i nomination angutsü atema delegates nungi vote peria ngutetogo ta ashir.

Biden aser taoba tir Donald Trump tsüngta ka shimtsü atema vote agütsür aika tezü tanga alidang Harris-i tokteptsü sangdongba ajanga US election nübuyim nung asendenshir. Ajidang masü rongsenketzüng jenjang, American foreign policy aser danga ken o aika nung nüburtem mepelai lir.

Deobarnü Biden-i US tir election nung tanaben metokteptsü ta sangdongba sülen taoba House of Representatives Speaker Nancy Pelosi aser Michigan indang Governor Gretchen Whitmer aser California indang Governor Gavin Newsom nungertem densema Democrats nungi tejangja ketdangsür aikati Harris bhukumer.

(Maneni tapak 8 nung...)

Nepal nung tayimtsü ka tsükok, pilot dang takum kumzük

Kathmandu, Chiteni/July 24 (Agencies): Bodhbarnü Nepal yimtiba Kathmandu nungi tayimtsü ka apusodang tsükoka mi adokba sülen nisung 18 asü.

Tang mozüki nung temang anepalua alisang pilot ya kisüing iba lendong nungi takum jenbu.

Saurya Airlines test flight nungya airline indang technical staff aser crew members ana densema nisung 19 liasü.

Nepal indang aviation industry nung safety record kanga mejungi lir, kong tzüngsang mopung takzütüsü makokba aser temzüng-ozüing tashi maitba ajanga küm aika yamaji arur.

Tayimtsü ya Tribhuvan International Airport nungi apusor minute ishika lir anüngdang 11:15 ako meta iba lendong ya atalok, ta Nepal Civil Aviation Authority indang search and rescue coordination centre ajanga ashi.

Mapang shia maintenance check aoba nung shilem ka ama Saurya Airlines test flight ya

Bodhbarnü Pokhara bushia aorba liasü.

Tayimtsü ya ali yutsür minute-a majungdang iba lendong ya atalok, ta airport tekolakba Jagannath Niraula-i ashi aser airport ketdangsür temi iba lendong atalokba kuli magütsüteti lir.

Ajisüaka Tribhuvan International Airport indang tekolakba-ibo, lendong atalokli asadangba nung tayimtsü ya direction tai leni yima aoba sayur, ta ashi.

“Ali nungi pilali achichi leni meyip, saka shidakba nungbo abeleni meyiptsü liasü,” ta Niraula-i osangbener dang ashi.

Iba lendong atalokba tesem nung tangokba video nung tayimtsü ya runway tekalen makepshia liasü aser ali nung oa jioka mi adok. Kanga kera iba tayimtsü ya mi aser mokoziü agi nembanga liasü.

Ketdangsürtem iba tayimtsü bushia aodang tayimtsü shilem tuluba nak-naka rongdoker aliba noksa tema nguogo. Iba lendong

atalokba sülen fire engines aser ambulances tem oa liasü.

Asürtem rongnung Nepal nunger parnok 17 liasü aser Yemen nunger ka liasü, shiba engineer ama mapa inyaka liasü.

Pilot ya tenük aser tenütsü nung yiru saka takum lendongi aitsüsabo masü, ta police odongtar Dan Bahadur Karki-i osangbener dang ashi.

Nepal air safety record majungba yong taoba mapang nungi aija arur. 2023 küm January ita Yeti Airlines indang tayimtsü ka pilot-i aibelena power shibangba sülen tsükokba nung nisung 72 asü.

1992 küm Pakistan International Airlines indang tayimtsü ka Kathmandu Airport tonga arudang tsükoka yangji mena aliba passenger ajak (167) asü.

Saruya Airlines yagi Nepal telungzük nung tesem pongu nung par tayimtsü Bombardier CRJ-200 jets asem senzüdaksür ta company indang website ajanga ashir.

Office of the
AO SENSO TELONGJEM NOKLAK

Noklak; Nagaland – 798626

PELASHISHIA JAOKER

Ao Senso Telongjem, Noklak küm 50 ajungba Hon Jubilee benjongmung August 2, 2024 anepdang 11:00 ako nungi tenzükua Multi Disciplinary Sports Complex, Noklak nung ZÜROKETA (GENERATION) omen nung ajemdaker amungtsü alinung taoba mapang AST nung inyaka alir aser züngsem ajak pelashishia jaoker.

Iba sentong nung Ao Senden tir Marsanen Imsong Sentong Akümdong alitsü aser tongti o jembir Rev. Moatoshi, Pastor, Tuensang Town Ao Baptist Church alitsü.



Nenok dang tsüngtong arua jaokba osang magütsütetba atema sasar, saka nenok ajak iba benjongmung nung adentsü AST-i imlaa atar.

Sd/-
Mr. TIANUNGBA
President
M.8974620194

Sd/-
Mr. ARENKABA
Secretary
M.9862635757

Office of the
Longchi Longkum Kidong Lakhuni

BPO Alongtaki, P.O. Mangkolemba

Date: 24.7.2024

SANGDONGER

Mr & Mrs. MOANINGSANG LKR S/o Late. TEKAMAYANG LKR (Lakhuni) ajanga kija aser lokti kar dang tanga sentsüh bener arura ibaji kidongi memetet, aser kidongi par indang khuret mabentsü ta sangdonger.

Kidong nungi,

1. Imtiangshi Lkr
2. Asemwati Lkr
3. Tekawati Lkr

Sd/-
Shiluti Lkr
Secretary

Longchi Longkum Kidong, Lakhuni

TATOK MESHIR

Ni, **Sanglipong Pongen**, S/o Sakutemjen Pongen (Ungma), Artang ward nung alir. Ni Sanglir Vlog YouTube nung Artang ward lenmang indang jembio. Iba dak sentakba ken O ajak ni ajung asa-a Ungma Lika nung lipok dang nungi akbu wasü lenmang ta ja-a aruba ni ajangzüktsü mechi nung ni N.I. Jamir road ta melentsü. Iba ken O dak ajemdaker Ungma Kusasanger pusu yimsüsürtemi ni 23rd July, 2024 anogo jaoka ken O aka, aser ni tai ta tatok meshia nangzükur.

Ungma Kusasanger pusu menden-i sobaliba dak aketba ama merenshiba ni agizükur. Tarutsü nung yimdenyimli angateta inyaksangshitsü yimsüsür dang nangzükur.

Sd/-
Sanglipong Pongen
S/o Sakutemjen Pongen
Artang Ward, Mokochung

Paramilitary RSF-i sensaksemtsü atema mulunga agizükogo

Khartoum, Chiteni/July 24

(Agencies): Sudan nung tang rara aliba telok ana cease fire atema sensaksemtsü asoshi United States-i jaokba sülen paramilitary Rapid Support Forces (RSF)-i ashiba agi, sensaksem nung shilem agitsü atema parnok renema lir.

RSF lenir Mohammed Hamdan “Hemedti” Dagalo-i Bodhbarnü ashiba agi, iba sensaksem nung paramilitary group-i shilem agitsü. Mangatettep adoker aliba tembangdaksütüsü atema US-i Mongolbarnü RSF aser Sudanese army na August 14 nü Switzerland nung sensaksemtsü atema jaoka liasü.

US-isa, iba sensaksem ya Saudi Arabia den longjemer

ayongzükogo aser African Union, Egypt, United Arab Emirates aser United Nations nunger observers asütsü, ta ashi.

US Secretary of State Antony Blinken-i ashiba agi, “Switzerland nung sensaksem ayongzükba ya linük ajunga nung azütokshi lendong ataloker aliba tembangdaksütüsü, nüngdaka alir ajak nem humanitarian teyari agütsütsü aser tenangzüktepba tem shitak benoka inyaksü atema monitoring aser verification mechanism ka benoktsü atema lir.”

Abdel Fattah al-Burhan-i aniba Sudan indang army-i tang tashi kecha telangzüba agüja mali.

(Maneni tapak 8 nung...)

Nagaland nungi dart asayartemi takok tajung angu



Kohima, Chiteni/July 24 (TYO): 10 buba Bengal Rowing Club (BRC) Summer Darts Open Championship 2024 July 17 nungi 21 nü tashi BRC, Kolkata nung asayaogo. Iba asayamung ya Indian Darts Council (IDC) tawabangba kübok asaya liasü.

Team One Nagaland (TON) nungi asayar teri iba asayamung nung shilem agi aser parnoki item category tem nung takok ngua liasü:

OPEN CHAMPION - Vikehelie Suohu & Aryaveer Chokhani

OPEN DOUBLES RUNNERS-UP - Joshua & Sangam Roy

DRAW DOUBLES CHAMPION - Joshua Semou & Jal Bhavsar

INDIAN DARTS LEAGUE (IDL) TEAM EVENT, RUNNER UP - Oto Angami (Team Rockers)

INDIAN DARTS LEAGUE (IDL) TEAM EVENT, JOINT THIRD - Kevichüzo Zumvü (ILS Dart Raiders)

BRC ROOKIES MEN RUNNER UP - Kelhousatuo Yiese

MOST PROMISING PLAYER - Joshua Semou

BRC YOUTH - JOINT 5th - Joshua Semou

BRC MEN'S SINGLES - JOINT 5th - Joshua Semou

INDIAN DARTS COUNCIL NATIONAL RANKING - JOINT 5th - Vikehelie Suohu

Kasa mapang nung TON-i sangdong ka ajanga, asayartem senzusenpongtsü, anenzüksü aser achiajemtsü atema senotsü intokba ajak temiemertemi tenla tajung agütsüba ajanga achaayangogo, ta ashi

Dr T Ao Inter-district Trophy atema K DFA-i football trial ayonger

Kohima, Chiteni/July 24 (TYO): Kohima District Football Association (K DFA)-i sangdong ka ajanga, taruba Dr. T. Ao Inter-District Trophy 2024 atema Kohima district football team shimtsü asoshi July 30 nü 10 ako nungi tenzüka selection trial agitsü ta metetdaksüogo. Iba trail ya IG stadium, Kohima nung agitsü.

K DFA kübok züngoksema aliba asayartem dang trial nung shilem agitetsü, ta kasa sangdong ajanga metetdaksü.

Team ya Roko Angami (AFC 'B' Licence Coach), Kevilebei Zashümo (AFC 'B' Licence Coach), Vizovor Liezietsu (AFC 'C' Licence Coach), Akho Sorunuo (AFC 'D' Licence Coach), Visakholie

Medoze (AFC 'D' Licence Coach), aser Thangchapu Rongmei (AFC 'D' Licence Coach) nungeri achaayanga shimtsü.

Trail dak sendakba nung osang tejangjaba agitsü atema item number; 9402211604/9862272608 tem ajanga t o n g t e p r a t e p t s ü metetdaksüogo.

Israel nem tenokdangba agütsütsü akhangba IOC aser Macron-i magizük

Chiteni/July 24, 2024 (Agencies): International Olympic Committee (IOC) committee tekolakba aser France tir Emmanuel Macron nati Mongolbarnü Palestine-i Gaza nung rara dak sendakba nung Israel team Paris Olympics nung masayadaksütsü atema takhangba agütsüba magizük.

Israel team Athletes' Village nung anenzükur aliba mapang IOC-i, Palestine Olympic Committee-i Israel nem tenokdangba agütsütsü khangba shiti ka yokba asadangogo. Shiti nung Gaza amakba ya Olympic truce anema lir ta shia lir.

Hokolbarnü nungi tenzüka Olympics asayatsü lia shiti nung Palestine nunger asayartem aser talisa Gaza nung alirtem sadem sadema senzusenpongtsü atema temelaba magütsür aser tang mangatettep adoker aliba

ajanga parnok kanga timtemogo, ta shia lir.

Shiti nungsa Palestine nunger asayar 400 shi tepsetogo aser sports facility tem raksatsüba ajanga asayartem timtem tali kümdaksüogo, ta ashi.

IOC tir Thomas Bach-i, pa yimden yimsüsüba nem matsüokdaksütsü, ta ashi.

Pai, "IOC tamendakdak tejangja lir. National Olympic Committees ana lir aser iba ya alima politics dang nungi balaka aser iba dak sendakba nung committee anaprongla yimjung nung dang inyaksangshia arudar," ta pai Paris nung osangbenertem den sensaksemba mapang ashi.

"Palestinian NOC kanga ajangzükogo. Palestine ya UN indang recognised member state ka masü, saka NOC ya recognised National Olympic Committee ka lir aser tanga NOC tem ama kasa temeden

asem maongka agia arudar," ta pai ashi.

France nunga left-wing yimden yimsüsür kari Russia aser Belarus nunger asayartem ama Israel nunger asayartem nem tenokdangba agütsüba parnok linük tenüng nungi masayadaksütsü atema ayongzükogo.

"Israel nunger asayartem ozü linüki pelashishia jaoker," ta France tir Emmanuel Macron-i Mongolbarnü ashi.

"Parnok pei linük tenüng nungi tokteptetsüla, kechiyong Olympic movement-i iba telemtetba agiogo," ta pai France2 television den sensaksemba mapang ashi. Paisa, "France tinyaktsüji parnok nem security agütsütsüba dang lir," ta shisem.

"Asayartem lendong nung toktsütsü merangba aser parnok amokmerenba ni aitsür," ta paisa shisem.

2buba Autumn Cup Medziphema nung asayatsü

Dimapur, Chiteni/July 24 (TYO): 2buba Autumn Cup Local Ground Medziphema nung August 17 nü nungi tenzüka asayatsü. Iba asayamung ya arishi küm 35 temapurtem atema lir.

Chumoukedima Football Referee Board (CDFRB)-i ayongzükba iba asayamung ya asayar tejentem nem asayatsü asoshi sabang ka agütsütsü aser yimya tajung nung tokteptsü atema maongka agütsütsü

nükjidong nung ayongzükogo. Taküm iba asayamung ya "Health First" omen nung ajemdaker asayatsü. Asayamung ya League cum Knock Out yimya nung asayatsü.

Asayamung nung shilem agitsü jangraba team tem dang item number; 88374 39647 / 81199 59662 ajanga tongteprateptsü asoshi asayamung ayongertemi metetdaksüogo.

BENDANGLI OSANG : Tapak 7 nungi...

Trump jakla ni kanga junga meteta...

US House of Representatives aser US Senate nung Democrat lenir Hakeem Jeffries aser Chuck Schumer nung Harris yaritsü ta Mongulbarnü sangdonga liasü.

Deobar nikongdang nungi Hombar nikongdang tashinung Harris indang nübuyim nung sen million \$100 dak tema bendenogo aser item ya shilem 62 shi first-time donors nungi lir ta shir.

"Tiazü jembir Kamala Harris-i kongshiba ajak lai samatsür!" ta Trump-i pa indang Truth Social sapang nung Mongulbar nikongdang zülüja liasü.

Biden mapang US-Mexico arütsü alema migrant aser asylum bushir aika aruba atema Republicans temi Harris tenüng asen aser la dang administration indang "border czar" lir ta aja.

"Asenek ya nüburtemi tashi

agütsüba nübuyim ka lir aser iba yongji nübur mezting südaksüba tir ka asütsü," ta lai ashi.

November ita US voter temi mangdang ana rongnung ka shimtsü, kaji asen tarutsü nung ranglokba aser kaji tesüba nung ranglokba lir.

Taoba mapang California indang attorney general inyaka alilai "predators", "fraudsters" aser "cheaters" merenshiba ajanga la nübuyimba nung ajangzüktsü ta ashi.

"Ni Donald Trump yimya meteta lir ta ashidang ajaki angatetang. Aser iba nübuyim nung ni mashi mapang pa den tejak tenteta raratsü nangzükur," ta Harris-i ashi.

Trump-i business records tiazü agütsü, magazine columnist ka meshidaki amshi ta tai tonglokja lir aser 2020 election indang results melenshitsu tsü meranga mapa tamajung inyak ta ken o ana benoka lir.

Paramilitary RSF-i sensaksemtsü...

Dagalo-i, sensakemtsü atema jaokba pelashishia agizükur, ta ashi.

"Onoki onok tamendakdak tali jangshitsür, koba taküm kümzüktsü, rara anentsü aser yimjung nung sensaksema linük nung civilian yimsüsüba amenoktsü atema lir," ta paramilitary lenir yagi ashi.

RSF aser military sorkar na 2023 küm April ita nungi rara arudar. Iba rara nung nisung meyirejang aika tepsetogo aser nisung million 10 dak tema pei talidak ki toktsür jenshiaogo, ta United Nations-i ashi.

Mongolbarnü UN sangdong ka ajanga ashiba agi, Sudan nung nisung million 26 shi rara ajanga chiyongtsü teperi mongui lir.

Blinken-i ashiba agi, iba rara tembangdaksütsü atema partner tem den longjemer inyaktsü bendanga agütsür lir. "Iba sensaksem ya arrtsü

adener yimden yimsüsüba dak sendakba nung ken o bentettsü atema masü. Sudan nungertemi mapang talangka nungi akhangba ama Sudan nung sorkar ya nüburtem nem bendanga agütsütsüla aser nüburtemi yimden yimsüsüba aser linük nung democracy benoktsü atema tongtibang shilem agitsüla," ta pai ashi.

Ajisüaka rara tembangdaksütsü atema inyakyimtem takok monguteti arudar.

Taoba küm Saudi Arabia nung RSF aser army na indang indanga sensaksemba mapang khen atema rara anena atatsü dang mulungtepa liasü, koba telok anapronglia shitak benoka minyakteti maneni rara tenzük.

Iba sülen maneni rara anentsü atema sensaksem balala ayongzükba agiogo, ajisüaka tang tashi nung takok monguteti arudar.

BILEMDANGANG
"Tumulung molutetba ajanga maongka aika süitemdaksür."